

1. UVOD

Da bi se odredio sadržaj nasilja u porodici, najprije je potrebno definisati sam pojam nasilja. Nasilje je prisutno u svim istorijskim periodima razvoja društva i danas se manifestuje u raznim oblicima i u različitom intenzitetu. Bez obzira na reakciju društva i pojedinaca na pojavu nasilja, ono je i dalje prisutno i proizvodi štetne posljedice. U najširem smislu riječi o nasilju možemo govoriti kao o napadu na čovjeka, na stvari ali i na druge vrijednosti koje su od značaja za društvo i za pojedince. Zajedničko za sve definicije nasilja, uprkos razlikama između autora jeste da je nasilje uvijek proizvod sile koja je u stvari bitan faktor nasilja i instrument za ostvarivanje određenog cilja.

Nasilje u porodici ili kućno, odnosno porodično nasilje (eng. *domestic violence*) predstavlja nedopušteno ponašanje pojedinca prema ostalim članovima svoje porodice koje posljednjih nekoliko godina prelazi iz faze intime i skrivenih, tajnovitih odnosa u porodici, odnosno iz privatne sfere funkcionisanja najvažnije ćelije društva u fazu potpune otvorenosti, odnosno potpuni ulazak u žižu interesovanja ne samo pravničke već i sveukupne društvene javnosti. Nasilje u porodici spada u red najtežih oblika nasilja, jer izaziva nesagledive posljedice kako na individualnom tako i na društvenom planu.

Nasilje u porodici usmjereno je prvenstveno na ženske članove porodice. Počinioci su, sa izuzecima, muški članovi porodice.

Na osnovu razvoja nasilja u porodici i njegove rasprostranjenosti, nije teško zaključiti da se ne može raditi o nekim pojedinačnim poremećajima, već da se radi o pojavi koja je uslovljena raznim društvenim faktorima. Uzročnost nasilja se dovodi u vezu i sa prethodnim društvenim odnosima koji su doprinijeli vršenju nasilja u porodici, a ne samo sa aktuelnim društvenim odnosima.